

Նոր Դար Նոր Տեսլական

Հ.Բ.Ը. Միութեան 85րդ Ընդհանուր Անդամական Ժողով
Հալէպ-Սուրիա

Հալէպի Պատմական Բերդը Աննախընթաց Փառատօնի Թատերավայր

Հայկական Բարեգործական Ընդհանուր Միութեան տարեգրութեան մէջ հպարտառիթ էջեր արձանագրուեցան Սեպտեմբեր 30-էն Հոկտեմբեր 7 օրերուն, Հալէպի մէջ գումարումովը Միութեան Երկամեայ Ընդհանուր Անդամական Ժողովին, որ յատկանշական էր իր տարողութեամբ եւ բնոյթով:

Արդարեւ, Միութեան Կեդրոնական Վարչական Ժողովի անդամներ, գլխաւորութեամբ Նախագահ Տիար Պերճ Սեդրակեանի, մասնաճիւղերու պատկան մարմիններու ներկայացուցիչներ, իրաւասու անդամներ եւ բարեկամներ Միջին Արեւելքէն, Եւրոպայէն, Ամերիկայի Միացեալ Նահանգներէն, Հարաւային Ամերիկայէն եւ Հայաստանէն, Հալէպ ժամաներ էին քննելու Միութեան անցնող երկու տարիներու նիւթաբարոյական գործունէութիւնը եւ նոր մարտահրաւերներու լոյսին տակ ծրագրելու գալիք տարիներու աշխատանքները:

Հ.Բ.Ը. Միութեան 85րդ Ընդհանուր Անդամական Ժողովի եւ Յարակից Ձեռնարկներու Հիւրընկալ Գործադիր Մարմինին կողմէ խնամքով եւ ամենայն բծախնդրութեամբ պատրաստուած յայտագիրը սկիզբ առաւ Չորեքշաբթի 1 եւ Հինգշաբթի 2 Հոկտեմբերին, Տէր Զօր եւ Փալմիրա կատարուած այցելութիւններով: Տէր Զօրի մատուռէն ներս հոգեհանգիստի արարողութիւն կատարուեցաւ Ապրիլեան նահատակներուն եւ Միութեան հանգուցեալ բարերարներուն յիշատակին, ապա խումբը այցելեց Տէր Զօրի թանգարան:

Այս ընթացքին, «Շերաթոն» պանդոկին մէջ, Նախագահ Պերճ Սեդրակեան եւ Կեդրոնական Վարչական Ժողովի անդամներ խորհրդակցական հանդիպումներ ունեցան մասնաճիւղերու ատենապետներուն, վարչութեանց ներկայացուցիչներուն, ինչպէս նաեւ Հայաստանի Ներկայացուցչութեան եւ հայրենական ծրագիրներու համակարգողներուն հետ:

Հոկտեմբեր 2-ին, Հ.Բ.Ը.Մ.ի Գալուստ Կիւլպէնկեան կեդրոնէն ներս տեղի ունեցաւ Բարի Գալուստի ընդունելութիւն, որուն ներկայ գտնուեցան Ընդհանուր Անդամական Ժողովի մասնակիցներ, Միութեան Սուրիոյ մասնաճիւղի մարմիններու ներկայացուցիչներ, Սուրիոյ մօտ Հայաստանի Հանրապետութեան Դեսպան Արշակ Փոլատեան, Հալէպի Հայաստանի Հանրապետութեան հիւպատոսութեան ներկայացուցիչներ, հայ յարանուանութեանց տեղւոյն պետեր՝ գլխաւորութեամբ Բերիոյ Թեմի Բարեջան Առաջնորդ Շահան Եպս. Սարգիսեանի, ինչպէս նաեւ գաղութի մշակութային միութիւններու ներկայացուցիչներ: Հոկտեմբեր 3-ին խումբը այցելեց Ս. Սիմէոն պատմական եկեղեցին եւ շրջեցաւ Հալէպի պատմական վայրերը:

Ուրբաթ, 3 Հոկտեմբեր 2008ը աստեղային օր մը եղաւ հալէպահայութեան պատմութեան մէջ: Արդարեւ, աշխարհի հնագոյն քաղաքներէն Հալէպի խորհրդանիշ պատմական բերդին մէջ տեղի ունեցաւ Հայկական Բարեգործական Ընդհանուր Միութեան եւ Հայ Երիտասարդաց Ընկերակցութեան Սուրիոյ Շրջանակին կազմակերպած

գեղարուեստական աննախընթաց փառատօնը՝ բարձր հովանաւորութեամբ Սուրիոյ Աշխատանքի եւ Ընկերային հարցերու նախարարուհի Դոկտ. Տիեալա Ալիաճ Արէֆի:

Հալէպի պատմական բերդի տարածքին՝ հանդէսի սկիզբը յայտարարող զանգերու ղողանջներով եւ փողերախումբի ու թմբկահարներու նուագակցութեամբ, դրօշակակիրներ, սկաուտներ, մարզիկ-մարզուհիներ եւ յայտագրի բոլոր մասնակիցներ երեք մուտքերէ բեմ բարձրացան: Բեմին վրայ զետեղուած հեռատեսիլի հսկայ պաստառին վրայ մէջ ընդ մէջ կը ցուցադրուէին Հ.Բ.Ը.Մ.ի մասին պատմող վաւերագրական տեսարաններ:

Սուրիոյ եւ Հայաստանի պետական օրհներգերու կատարումէն ետք, օդ բարձրացան հարիւրաւոր գոյնզգոյն օդապարիկներ եւ տասնեակ մը աղանիներ, մինչ երգչախումբի կատարողութեամբ կը հնչէր Հ.Բ.Ը.Մ.ի քայլերգը: Գեղարուեստական բարձր որակով գործադրուած Փառատօն-Արուեստի երեկոյին ներկայ գտնուեցան աւելի քան չորս հազար հալէպահայեր, որոնք լեցուցած էին բերդին ամֆիթատրոնը:

Ելոյթ ունեցան Միութեան Հալէպի Սպենդիարեանի անուան երգչախումբը, «Անդրանիկ» պարախումբը, Կոմիտասի անուան Սենեկային նուագախումբը, մանկական պարախումբը, ինչպէս նաեւ մեներգողներ եւ ասմունքողներ՝ Սալբի Տարազեանը, Ռաֆֆի Գալայճեանը, Թամար Ինճեանը, Նանոր Միքայէլեանը, Լիլա Վարդանեան-Պօղոսեանը, Արմէն Խորոզեանը, բոլորն ալ միութենականներ: Յայտագիրը վարեց եւ ասմունքեց հալէպահայ մշակութային յայտնի գործիչ եւ Հ.Բ.Ը.Մ.ի Լ.Նաճարեան-Գ. Կիւլլէնկեան Երկրդ. Վարժարանի հայագիտական բաժնի վարիչ Յակոբ Միքայէլեանը: Փառատօնը եզրափակուեցաւ հրավառութեամբ մը, որ զեղեցկօրէն զարդարեց Հալէպի երկնակամարը:

Հայրենի արուեստագէտներ Հրաչեայ Աշուղեան, Աշոտ Համբարձումեան եւ Աշոտ Սարգսեան, ինչպէս նաեւ Հ.Ե.Ը.ի Կոմիտասի անուան Սենեկային նուագախումբի ղեկավար Յովհաննէս Մուպալէտ եւ Սպենդիարեանի անուան երգչախումբի խմբավարներ Շահէ Քէշիշեան եւ Պերճ Երեցեան, փայլուն յայտագիր մը մատուցանեցին հանդիսատեսներուն՝ անմոռանալի պահեր պարգեւելով անոնց: Հ.Ե.Ը.ի շուրջ 600 սկաուտներ, արենուշներ, ուսանող-ուսանողուհիներ եւ երիտասարդներ, կուռ շարքերով, ապացուցանեցին հալէպահայութեան եւ մանաւանդ մեր Միութեան կենսունակութիւնը:

Նոյն օրը, երեկոյեան, Հալէպի «Քասըր Ալուալի» արաբական ճաշարանին մէջ տեղի ունեցաւ ընթրիք մը, ի պատիւ Ընդհանուր Ժողովի մասնակիցներուն:

Հ.Բ.Ը.Մ.ի 85րդ Ընդհանուր Անդամական Ժողով

Շաբաթ, 4 Հոկտեմբեր 2008, առաւօտեան ժամը 11:00-ին, Հալէպի «Շերաթօն» պանդոկի սրահին մէջ բացուեցաւ Հ.Բ.Ը.Մ.ի 85րդ Ընդհանուր Անդամական Ժողովի առաջին նիստը՝ հովանաւորութեամբ Հ.Բ.Ը.Մ.ի Կեդրոնական Վարչական Ժողովին եւ նախագահութեամբը Մերթ Պերճ Սեդրակեանի: Յատուկ հրաւերով ժողովին ներկայ էր նաեւ Հայաստանի Հանրապետութեան Սփիւռքի նախարարուհի Տիկին Հրանդ Յակոբեանը:

«Նոր Դար, Նոր Տեսլական» խորագրով այս Անդամական Ընդհանուր Ժողովը, որ առաջինն էր Միութեան երկրորդ հարիւրամեակի սեմին, յատկանշական էր մանաւանդ իր կայացումովը պատմական Հալէպ քաղաքին մէջ, որ կը խորհրդանշէ

ցեղասպանութենէն վերապրած հայութեան կենսունակութիւնը: Ժողովը հաստատեց անցնող երկու տարիներուն՝ նոր հրամայականներու դիմաց Միութեան որդեգրած նոր կողմնորոշումները եւ իրագործումները, շեշտելով համամիութենական գործելաձևը եւ Հայրենիք-Միիւնք փոխադարձ հզօրացումի քաղաքականութիւնը:

Հ.Բ.Ը.Մ.ի Նախագահ Մեթր Պերճ Սեդրակեան իր բացման խօսքին մէջ ըսաւ. «Հ.Բ.Ը. Միութեան 85րդ Ընդհանուր Անդամական Ժողովը, որ համախմբած է մեզ պատմական Հալէպ քաղաքին մէջ, առիթ մըն է անդրադառնալու մեր ազգանուէր Միութեան երախտաշատ գործունէութեան: Միաժամանակ, անիկա պատեհութիւն մըն է գիտակցելու այն առաջնորդող եւ պատասխանատու դերին, որ վստահուած է մեզի, իբր համազգային մեծագոյն կազմակերպութիւն, մեր ազգի եւ Միութեան անկիւնադարձային այս հանգրուանին: Մեր Միութեան փառաւոր անցեալը ապագային կամրջող այս հանգրուանին, մենք անցնող երկու տարիներուն յաջողեցանք Միութեան արդիականացած գործելակերպը եւ նոր ուղղութիւնները գործնական քայլերու վերածել:

Նախագահ Սեդրակեան շարունակեց. «Մեր Միութիւնը ապակուսակցական կազմակերպութիւն մըն է, բայց միշտ ունեցած է եւ կը շարունակէ ունենալ ազգային քաղաքական յստակ դիրքորոշում, Մայր Հայրենիքի եւ Ժողովուրդի բարօրութեան եւ բարգաւաճումին, եւ հայ մշակոյթի պահպանումին, հարստացումին ու տարածումին ի խնդիր: Մենք պատրաստ ենք գործակցելու բոլոր կազմակերպութիւններուն հետ, որոնց գործունէութիւնը ուղղուած է հայրենիքի հզօրացումին: Որովհետեւ համոզուած ենք, որ հզօր հայրենիքով կ'երաշխաւորուի հայ ժողովուրդի գոյատեւումը»:

Խօսելով Միութեան ապագայ ծրագիրներուն մասին, Պրն. Նախագահը ըսաւ. «Պէտք է իրատեսութեամբ ընդունինք, թէ նոր սերունդը այլեւս չ'ապրիր անցեալին մէջ, շաղուած է իր շրջապատի ընկերային եւ մշակութային իրականութեան եւ այդ իսկ պատճառով ենթակայ է կորսնցնելու իր դիմագիծը եւ հեռանալու հայ կեանքի աւանդական գործունէութիւններէն, մասնաւորաբար ոչ-հայրենամերձ գաղութներու մէջ: Այս ուղղութեամբ արդէն ճշդած ենք մեր կողմնորոշումը եւ առած հիմնական նախաքայլեր, միշտ իբր հիմք ունենալով Հայաստանի իրականութիւնը եւ անոր հետ մնայուն հաղորդակցութեան կենսական անհրաժեշտութիւնը»:

Պրն. Սեդրակեան շնորհակալութեան եւ գնահատանքի խօսք ուղղեց Սուրբիոյ Շրջանակային Յանձնաժողովին եւ մասնաճիւղերուն, իրենց հիւրասիրութեան եւ կազմակերպչական բժախնդիր աշխատանքին համար: Իր ելոյթը եզրափակեց՝ հրաւիրելով անդամակցութիւնը, մասնաճիւղերը եւ Միութեան հաւատաւորները, «ուժերու առաւելագոյն լարումով, եւ միասնական ճիգերով առաջ տանելու Հայկական Բարեգործական Ընդհանուր Միութեան ազգանուէր գործունէութիւնը, հաղորդակից մնալու ժամանակի շունչին, մասնակից ըլլալու մեր ժողովուրդի դէպի պայծառ ապագայ երթին, ու մանաւանդ՝ տեսլական մեր նոր կառոյցներու կերտումը դիտելու երիտասարդութեան աչքերով ու ձգտումներով, եւ մեր պատասխանատուութիւնները պատուով յաջորդ սերունդին փոխանցելու բարձր գիտակցութեամբ»:

Նախագահին կողմէ Ժողովի Ատենադպիրի, Ստուգիչ, Քուէախոյզ եւ Բանաձեւումներու Յանձնաժողովներու նշանակումներուն յաջորդեց Ստուգիչ Յանձնախումբի որոշումին հրապարակումը, որով Միութեան Հիմնական Կանոնագրին տրամադրութիւններուն համաձայն, անձամբ ներկայ եւ փոխանորդագրերով նուագագոյն

անդամներու թիւը ապահովուած ըլլալով, 85րդ Ընդհանուր Անդամական Ժողովը օրինաւոր կը նկատուէր:

Միութեան 2006-2007 տարեշրջաններու ընդհանուր նիւթական եւ բարոյական, ինչպէս նաեւ Հաշուեքննիչ Յանձնախումբի տեղեկագրերը յաջորդաբար ներկայացուեցան Կեդրոնական Վարչական Ժողովի անդամներ Ռուբէն Քէշիշեանի, Սինան Սինանեանի եւ Վազգէն Եագուպեանի կողմէ:

Հակառակ համաշխարհային գետնի վրայ տիրող տնտեսական վերիվայրումներուն, Միութեան հաշուեկշիռը առողջ պատկեր մը կը պարզէ: Ընդհանուր Անդամական Ժողովին ներկայացուեցաւ նաեւ Հ.Բ.Ը.Մ.ի 2006-2007 երկամեայ մանրամասնեալ տեղեկագիրը եւ հաշուեկշիռը ներկայացնող հրատարակութիւն մը, որով ժողովականներ հանգամանօրէն ծանօթացան միութեան ելեւմուտքին եւ երկամեայ բեղուն գործունէութեան:

Կեդրոնական Վարչական Ժողովի անդամներ վերընտրուեցան Նախագահ Մեթր Պերճ Սեդրակեանը, Արիս Ադամեանը, Ժոզէֆ Պասրալեանը, Նազարէթ Ֆըստըքճեանը, Վահէ Կապրաշը, Արտա Ն. Յարութիւնեանը, Սարգիս Ճէպէճեանը, Լեւոն Նազարեանը եւ Սէմ Սիմոնեանը: Առաջարկուեցաւ իբրեւ ՀԲԸՄի Կեդրոնական Վարչական Ժողովի նոր անդամ ընտրել Երուանդ Զօրեանը, որուն թեկնածութիւնը միաձայնութեամբ եւ ծափահարութիւններու ներքոյ ընդունուեցաւ ժողովին կողմէ:

Դոկտ. Զօրեան խօսք առնելով, շնորհակալութիւն յայտնեց իրեն հանդէպ ցուցաբերուած ջերմ վերաբերումին համար, մատնանշելով թէ իր կեանքի կողմնորոշումը հունաւորող գործօնները կու գային իր ծնողքէն եւ Հ.Բ.Ը.Մ.ի Լ.Նաճարեան-Գ. Կիւլպէնկեան վարժարանէն ու Միութեան շարքերէն:

Ընդհանուր Անդամական Ժողովը առիթ էր նաեւ պատուելու այն անձնաւորութիւնները, որոնք կարելոր նպաստ բերած էին Միութեան գործունէութեան ծաւալումին եւ Սփիւռք-Հայրենիք յարաբերութիւններու սերտացումին:

Ձեռամբ Նախագահ Պերճ Սեդրակեանի, պարգեւատրուեցան Հայաստանի Հանրապետութեան Սփիւռքի նախարարուհի Տիկին Հրանոյշ Յակոբեանը, Հայաստանի Հանրապետութեան Արտաքին Գործոց նախկին Նախարար Վարդան Օսկանեանը (ի բացակայութեան), Սուրիոյ մօտ Հայաստանի Հանրապետութեան նախկին Դեսպան Լեւոն Սարգիսեանը, Virtual College ծրագրի ղեկավարներէն, հայրենի գիտնական Սամուէլ Շուքուրեանը, Խորհրդային Հայաստանի Սփիւռքի Կոմիտէի նախկին ղեկավարներէն Ռոմէն Կոզմոյեանը, եւ Միութեան Միլանոյի մասնաճիւղի վարչութեան երկար տարիներու գործունէայ անդամուհի Կէկէլ Խաչատուրեանը:

Իր ելոյթին ընթացքին, Նախարարուհի Հրանոյշ Յակոբեան, որ իբրեւ նախարարուհի իր առաջին պաշտօնական այցելութիւնը կը կատարէր դէպի սփիւռք, խօսեցաւ հայապահպանման, հայ ժողովուրդի ներուժի օգտագործման, դէպի բարգաւաճ Հայաստան հայրենադարձութեան տեսլականին, ինչպէս նաեւ Հ.Բ.Ը.Մ.ի հետ համագործակցութեան մասին, դրուատելով հայրենիքի նկատմամբ անոր կատարած նախախնամական դերը:

Հ.Բ.Ը.Մ.ի Դամասկոսի տեղական մասնաժողովի Փ.Ատենապետ Պերճ Պարսումեան ընթերցեց Բանաձեւումի Յանձնախումբի որոշումները, որոնք վաւերացուեցան Ժողովին կողմէ: Խօսք առաւ նաեւ Շրջանակային Հիւրընկալ Յանձնաժողովի Ատենապետ Տոքթ. Պետրոս Պոյաճեանը յայտնելու իր շնորհակալութիւնը եւ գնահատանքը Յանձնաժողովին հանդէպ ցուցաբերուած վստահութեան եւ իրեն գործակից մասնաճիւղերու, վարչութեանց եւ Հ.Ե.Ը.ի նուիրեալ աշխատանքներուն համար: Ժողովը եզրափակուեցաւ Նախագահ Պերճ Սեդրակեանի փակման խօսքով, որ ընդհանուր գիծերով վերահաստատեց Միութեան յառաջիկայ երկու տարիներու գործունէութեան հիմնակէտերը:

Նոյն օրը երեկոյեան, նոյն պանդոկին մէջ, տեղի ունեցաւ Հ.Բ.Ը.Մ.-ի 85րդ Ընդհանուր Անդամական Ժողովի առթիւ կազմակերպուած Կալա-Պարահանդէսը, որուն ընթացքին Սուրիոյ մասնաճիւղին կողմէ յուշանուէրներ յանձնուեցան մասնաճիւղերու ներկայացուցիչներուն: Արտասանութիւններով եւ խանդավառող խօսքերով պարահանդէսը ձեռնհասօրէն վարեցին Պերճ Պարսումեանը եւ Թամար Խապայեանը:

Կիրակի, Հոկտեմբեր 5ին, հիւրերը այցելեցին Հ.Բ.Ը.Միութեան Լ. Նաճարեան-Գ.Կիւլպէնկեան Երկրորդական Վարժարան, ուր դիմաւորուեցան դպրոցի աշակերտութեան եւ ուսուցչական կազմին կողմէ: Կիւլպէնկեան հանդիսասրահին մէջ վարժարանին սաները գեղարուեստական կոկիկ յայտագիր մը ներկայացուցին հիւրերուն, որմէ ետք ելոյթ ունեցան վարժարանի Տնօրէն Աւետիս Պազգալեանը եւ Նախագահ Մեթր Պերճ Սեդրակեանը, որ խօսեցաւ Հ.Բ.Ը.Մ.ի աշխարհատարած վարժարաններուն եւ ընդհանրապէս Միութեան ծաւալած կրթական գործունէութեան մասին, որ կ'ընդգրկէ բազմաթիւ եւ բազմաբնոյթ ծրագիրներ սփիւռքի եւ հայրենիքի մէջ: Հանդիսութեան աւարտին, հիւրերը անցան Հ.Բ.Ը.Մ.ի Գալուստ Կիւլպէնկեան կեդրոն, ուր Միութեան Հալէպի պատասխանատուները հիւրերուն ծանօթացուցին կեդրոնի յարկերուն վրայ տեղադրուած Միութեան գրասենեակներն ու գործունէութեան համար նախատեսուած սրահները, որոնց կարգին՝ Հ.Ե.Ը.ի Սարեան Ակադեմիայի սաներու գեղանկարչական ցուցահանդէսի աշխատանքները:

Երկուշաբթի, 6 Հոկտեմբերին, առաւօտեան, Դամասկոսի նախագահական ապարանքին մէջ, Սուրիոյ Հանրապետութեան Նախագահ Դոկտ.Պաշար Ասատ ընդունեց Հ.Բ.Ը.Մ.ի Նախագահ Պերճ Սեդրակեանի զլխաւորած պատուիրակութիւնը: Շուրջ մէկուկէս ժամ տեւած հանդիպումը առիթ էր խօսելու Հ.Բ.Ը.Միութեան գործունէութեան, ինչպէս նաեւ Հայ եւ Արաբ ժողովուրդներու բարեկամութեան մասին: Ընդհանուր Անդամական Ժողովի մասնակիցներ Դամասկոսի շրջանին մէջ շրջապտոյտ մը ունեցան դէպի Սէյտնայա եւ Մաալուլա վանքեր, ինչպէս նաեւ Ումաուի Մզկիթ:

Հայկական Բարեգործական Ընդհանուր Միութեան 85րդ Ընդհանուր Անդամական Ժողովը նոր ոգեւորութիւն յառաջացուց միութեան աշխարհատարած մասնաճիւղերը ներկայացնող անդամներուն մօտ, որոնք իրենց գաղթօճախները վերադարձան լաւագոյն յուշերով ու տպաւորութիւններով:

Յովիկ Էօրտեքեան
(Հալէպ-Երեւան)